

四庫全書

子部

欽定四庫全書

黃氏日抄卷四十五

宋 黃震 撰

讀諸儒書 十二

石徂徠文集

頌

宋頌九首序略云奮為宏休擣為英聲昭為烈光暉暉
曄曄如日之華鏗鏘訇訇如雷之行暢於無窮揚於
無上江浸海流天高地厚不有窮盡若我太祖一駕

而下潞再矢而定揚三揖而納荆潭四指而收蜀廣
五征而平江南太宗南致淮海數十州之地北縛并
元四十五年之寇真宗暫臨澶淵匈奴喪威墮膽迨
今四十年不敢箠馬而南今皇帝明道之初獨臨軒
墀神謀睿斷如雷之動六合莫不震焉發施號令如
風之行萬民莫不見焉登任哲人翦鋤姦惡天清地
明日燭月霽乃作為宋頌九篇○皇祖太祖殺李筠
滅李重進也湯湯取孟昶也○莫醜取廣州也○金

陵取李煜也。聖文吳越歸也。六合雷聲太宗取
劉繼元也。聖武戎犯澶淵真宗親臨六師也。明
道今皇帝獨臨軒墀聖政赫然日新也。

慶厯聖德頌序畧云古者一雲氣之祥一草木之異一
蹄角之怪一羽毛之瑞當時羣臣猶且濃墨大字金
頭鈿軸以稱述頌美時君功德以為無前之休丕天
之績如仲淹弼實為不世出之賢求之于古堯則夔
龍舜則稷契周則閎散漢則蕭曹唐則房魏陛下有

之諸臣亦皆今天下之人望為宰相諫官者陛下盡用之此比雲氣草木蹄角羽毛之異萬萬不侔豈可翻無歌詩雅頌以播吾君之休聲烈光神功聖德刻于琬琰流於金石告於天地奏于宗廟存于千萬年而無窮盡哉○頌畧云大聲颶颶震搖六合如乾之動如雷之發○惟仲淹弼一夔一契○衆賢之進如茅斯拔大姦之去如距斯脫○皇帝一舉羣臣懾焉諸侯畏焉四夷服焉臣願陛下壽萬千年

古詩

嘉陵江泛舟孤棹已夷猶數峰更清尚危影倒波底凝
嵐浮水上。遠與城市絕深將泉石向水鳥忽東西
溪雲時下上

三豪詩以曼卿永叔期杜默師雄師雄二十二筆距犴
如鷹才格自天來詞華非學能

贈張績禹功先叙唐文人云卒能霸斯文昌黎韓夫

闕

軻揚雄臯陶伊尹不修乎德與行特屑屑然致意於
數寸枯竹半握瓦毫間將以取高乎又何其淺也且
夫書乃六藝之一耳善如鍾王妙如虞柳在人君左
右供奉圖寫而已近乎執伎以事上者與夫臯陶前
而伯禹後周公左而召公右謨明弼諧坐而論道者
豈不遠哉愚按歐陽公乃徂徠同年進士後誌其墓
蓋知徂徠之深者

上范青州書為其父赴脂胸縣令而作又上徐州張刑

部書及上徐州扈諫議書亦皆為其父作縣而發若
今世公茂書者子為父謀言詞切至亦工於求人者
矣

與祖擇之書薦孫明復也云自周以上觀之聖人之窮
者唯孔子自周以下觀之賢人之窮者唯泰山明復
先生

與狀元君貺書囑其救文弊

上孫先生書云辱惠長詩褒借過實且曰攘臂欲操萬

丈夫力與熙道攻浮譌此得介之心

與范奉禮書闕其天自天人自人無感應之說

上韓經畧書謂有非常之事然後有非常之人有非常之人然後有非常之功今元昊猖狂亦非常也民所瞻仰也山林川谷丘陵民所取財用也非此族也不在祀典而老觀佛寺徧滿天下可恠也

恠說中畧云楊億窮妍極能綴風月弄花草淫巧侈麗浮慕纂組剗鏤聖人之經破碎聖人之言離析聖人

之意蠹傷聖人之道其為怪大矣

妖說下畧云堯舜禹湯文王武王周孔之道萬世常行
不可易之道也佛老以妖妄恠誕之教壞亂之楊億
以淫巧浮偽之言破碎之

愚按徂徠先生學正識卓闢邪說衛正道上繼韓
子以達於孟子真百世之師也楊億不過文詞浮
靡其害本不至與佛老等而亦闢之峻如此盖宋
興八十年浮靡之習方開闢所恠也恠所作也使

先生生乎今之世見託儒者之名進佛老之說者
闕之又當如何哉

亂原謂夷王下堂亂是以作宣公稅畝亂是以作秦開
阡陌亂是以作秦襄王太后臨軒亂是以作秦始皇
罷封建置郡縣亂是以作秦漢美人之號凡四十等
亂是以作漢武帝數宴後宮奏請多以宦官主之亂
是以作不反其始其亂不止

明禁謂國家之禁疎密不得中山澤江海皆有禁鹽

關

董史筆在漢武朝為東方朔戟在成帝朝為朱雲劍
在東漢為張綱輪在唐為韓愈論佛骨表逐鱷魚文
為段太尉擊朱泚笏今為公擊蛇笏噫天地鍾純網
至正之氣在公之笏豈徒斃一蛇而已軒陛之下有
罔上欺民先意順旨者曰公以此笏指之廟堂之上
有蔽賢蒙惡違法亂紀者曰公以此笏麾之朝廷之
內有諛容佞色附邪背正者曰公以此笏擊之則笏

之功也宜止在一蛇

畫歲貽君豫畧云吾家君豫才敏而少學為丹青形物
微妙吁與其丹青木草豈若丹青乃身炌有文藻與
其丹青馬牛豈若丹青爾德倬為騫由汝聽吾言馨
如芝蘭擲膠折筆無汚輕紉

尊韓畧云孔子為聖人之至吏部為賢人之卓孔子之
易春秋自聖人來未有也吏部原道原人原毀行難
禹問佛骨表諍臣論自諸子以來未有也嗚呼至矣

蠹書魚辭蠹書魚曰夫書豈吾之蠹耶云云聲律對偶之言斯文其蠹也愚意此亦為揚億發

歸魯名張生宗儒名孟生二生皆脫道士服故名

貴謀云喪身敗家亡國傾天下由聖賢之謀不用

救說謂道大壞由一人存之天下國家大亂由一人扶之古言大厦將顛非一木所支是弃道而忘天下國家也顛而不支坐而視其顛斯亦為不智者矣曰見可而進量力而動其全身苟生者歟

責素殮狗當吾戶猫捕吾鼠雞知天時有功於人食人之食可矣彼素殮尸祿者將狗猫雞之不若乎

辨惑天地間必然無者有三無神仙無黃金術無佛大凡窮天下而奉之者一人也莫貴於一人天地兩間苟所有者索之莫不獲也秦始皇求為仙漢武帝求為黃金蕭武帝求為佛勤亦至矣而秦始皇遠遊死蕭武帝餓死漢武帝鑄黃金不成吾知必無神仙也必無佛也必無黃金術也

明隱謂孫明復先生四舉進士不得乃退居泰山聚徒著書蓋有待也古之賢人有隱者皆避亂世而隱者也彼所謂隱者有匹夫之志守硜硜之節者之所為也聖人之所不與也先生非隱者也

賢李謂李相國迪能妻孫先生以女

兵制謂國家之制失在兵驕自太祖太宗亟用兵故賞賚厚天下既平兵革不用或老臥京師或飽食塞上或逸處郡邑或散居亭鄣未嘗荷一戈也而賞賚不

削於太祖太宗亟用兵時且有加焉於是日益驕而不可少下茲非兵之罪也失在謀國家者也

記永康軍老人說劉公隨祥符中為永康軍判官奪還先聖廟侵地止灌口祠淫祀導山泉入永康城闢西山峻路數事

趙延嗣傳趙延嗣者趙鄰幾舍人僕也舍人死遺三孤女一老乳母無一區宅一廛田延嗣為營衣食之資身為負擔不避寒暑數十年如一日三孤女自幼至

長延嗣終不識其面既長延嗣西走京師見宋翰林
白楊侍郎徽之發聲哭哭止具道趙氏之孤且言長
將嫁二公驚媿為迎入京師相與求良士為婿三女
皆歸延嗣始去趙氏門延嗣可謂僕名而儒行者矣
吁僕名儒行見之延嗣夫儒名而僕行者或有其人
焉得不愧於延嗣哉

漢論三篇論漢不能盡循周之道皆曹參陸賈叔孫通
之罪

中國論闢佛老也云有巨人名曰佛自西來入我中國
有龐眉名曰聃自胡來入我中國然愚按自西方來
者佛之徒非佛之身為巨人者也佛亦人耳曰巨人
者其徒之誕非果巨人也老氏於傳則自中國西入
胡今云自胡入中國亦未知何據也其治之之法欲
四夷近四夷中國處中國亦未知其可行否也

季札論以季札比伯夷恐太過

伊呂論謂伊呂功同其心則異伊有存夏之心呂無存

商之心

憂勤非損壽論辨鄭康成注文王世子云文王以憂勤損壽之說非且文王享年九十有七豈為損壽乎夫憂勤天下者聖人之心也安樂一身者匹夫之情也後世人君皆耽於逸樂壽命不長康成之罪也

牛僧孺論謂唐文宗問天下何由太平僧孺自謂小康面欺其君且怨其責成旬日三上章求退其悖亦甚王爵論謂三代天子稱王自周衰諸侯稱王漢因封子

弟為王於是僭奪之心生

陰德論畧云天地之治曰禍福君之治曰刑賞皆隨其
善惡而散布之夫人不達天地君之治硜硜焉守小
慈蹈小仁不肯去一奸人刑一有罪皆曰存陰德其
大旨謂不殺一人不傷一物則天地神明之所佑也
且天地能覆載而不能明示禍福於人樹之以君修
其刑賞人君能刑賞而不能親行黜陟於下任之以
臣收其威權違天地君而曰存陰德禍斯及矣

水旱責三公論謂責三公則君怠責君則相怠若時水旱君則罪已三公則免

書

上范中丞書慶仁宗用賢勉其與丞相李公竭王佐之才罄忠臣之節

上趙先生書謂昌黎述作有三代制度兩漢遺風今之為文不過句讀妍巧對偶的當而已非今之人盡不賢於唐之人盡不能為唐之文也蓋其弊自於朝廷

敦好時俗習尚清染積漸非一朝一夕也

上蔡副樞書薦鄆州鄉貢進士士建中之文言文之所
自始甚宏濶可觀

上孔中丞書云有某官為某官時忠鯁讜直聳動朝野
不四五年取顯仕今為某官位彌高身彌貴朝廷有
闕政不復言則向之忠鯁讜直乃沽名以為速進之
媒乎愚謂向非沽名後淫於富貴耳人若不自覺此
情於將軍黃金橫帶事可驗此士大夫得志於當世

者常常當痛省

上范思遠書亦盛揚士建中謂天下之賢

上劉工部書斥其以佛為聖人

上杜副樞書薦泰山孫先生

上李雜端書謂日月天之日御史天子之日

與士建中書謂方今淫文繁聲放於天下佛老妖恠誕
妄之教肆行於天地間周公孔子之道危若綴旒之
幾絕先生不救吾徒豈得而安居乎

與張洞進士書謂明遠纔三十二歲已能斬狼秀而擐
菁英出紅塵而磨蒼蒼

上王沂公書責其避嫌不用鄉人趙師民畧云合天下
之公也雖其親昵人不謂之私用一人之私也雖其
疎遠人不謂之公師民五十歲矣有萬卷書腐於腹
中若非相公洪鑪鉅鎚莫能成就

上王狀元書乞助改葬石氏七十喪云昔郭代公為太
學生家信至寄錢四十萬為學糧有縗服叫門云五

代未葬代公即命以車一時載去畧無留者亦不問
姓氏代公其年絕糧不能成舉柳河東布衣時坐酒
肆中有書生在其側言貧無以葬柳即搜於其家得
白金百餘兩錢數萬遺之故代公富貴功業光隆於
唐河東文章聲名照映本朝

上孫少傅書云生幸而值如孔子孟軻者同其時居幸
而遭如孔子孟軻者同其里則是坐遇孔孟親見聖
賢不隔數千百年得其人而師之不走萬數千里獲

其師而學之也凡皆歸慕孫公之說如此

答歐陽永叔書畧云書中且曰頻見僕所為文僕文字
實不足動人然僕之心能專正道不敢跬步叛去聖
人其文則無悖理害教者斯亦鄙夫硜硜然有一節
之長也書中又言僕書字恠且異古亦無今亦無為
天下非之此誠僕之病也此為之不能也然永叔謂
我特異於人似不知我也僕誠亦有負異於衆者則
非永叔之所謂也今天下為佛老其徒囂囂乎聲附

合響應僕獨挺然自持吾聖人之道今天下為楊億
其衆嘵嘵乎口一倡百和僕獨確然自守吾聖人之
經茲是僕有異乎衆者然亦非特為取高於人道適
當然也苟必欲取高於人古之聖人莫如周公孔子
古之大儒莫如孟軻揚雄古之賢聖莫如皋陶伊尹
天下之所尊莫如德天下之所貴者莫如行今不學
乎周公孔子孟軻

闕

入者娶仇而貶也書夫人氏之喪至自齊者殺子而
貶也書逆婦姜於齊者夫人之位不明也書遂以夫

人婦姜氏至自齊者譏喪娶也書僑以夫人婦姜氏至
自齊者刺不親迎也

謹政謂以諸侯而主天下盟會之政由莊十三年北杏
之會始以大夫而主盟會之政由文七年扈之盟始
後序云其於褒為仁為惠為澤於天時為春其於貶為
義為誅為戮於天時為秋故謂之春秋

賢惠錄

羈游四方錄婦人女子賢取其介潔惠取其聰敏

徐鉉母貧無宿儲中庭地陷見金銀一疋遽令覆之祝曰天其或者憫我之貧願二子有位請奉給養不願金銀也二子鉉錯後皆至達官

郭氏酸棗人割股肉愈姑之疾君子曰割股之孝非聖人之說李唐明州俚人陳藏器撰本草拾遺言人肉可治羸疾是後孝子多行之郭氏能行於姑難矣哉趙定母金陵人多通詩書常聚生徒數十人張帷講說儒碩登門質疑必引與之坐開發奧義咸出意表景

德二年子定登第授海陵從事訓曰無飾虛以沽名
無事佞以奉上處內在盡禮居外在活民定遵奉無
失

李氏揚州人夫以貿易為事常戒其夫曰無易良雜苦
取不義之富快一時之意撫其子曰宜以此為心無
令流餘殃也

劉工部妻陳氏世居袁州新淦嫁劉式倖薄家貧陳氏
曰但奉清白吾身執爨母為身累也夫死聚書千餘

卷示諸子曰此汝父嘗謂此為墨莊今貽汝曹為植
學之具不數年立言立之立德立禮相繼登進士科
岑頔母盧氏江寧人酷好篇什教子頔以詩書淳化三
年登進士第

曹修古女建安人修古博學以直氣聞明道初言事觸
罪自御史知雜降工部員外郎知興化軍卒妻孥窮
空無以歸吏民思之梓錢三十萬拜酌堂下家人未
及言女哭曰我先君處朝為聞人以清節自立不幸

天不與年終于貶所今臨財苟得尚何面目哭泣悱
中幸持歸無為先君累也吏民間之慚罷

孝行錄

余為旅人者三十年聞孝子之事必錄之蓋倣歐陽詹
南陽孝子傳之類也上助史官採摭下勸遠近風俗
易延慶筠州上高人父喪棄官廬墓旦出守墳暮歸侍
母開寶四年二月丙子墓西北產紫芝一本至九年
春三月丁亥復有玉芝十八莖生墓側延慶後以慶

思出知端州子綸大中祥符元年及第

陳宗道江陰軍茶村人以孝悌聞買物不酬價隨言予之人未嘗多取之服其德也

郭琮台州黃岩人絕飲酒茹葷者三十年以祈母之壽母年一百四歲旌表門閭

顧忻泰州泰興縣人以母多病葷辛不入口者十載鷄初鳴具冠帶率妻子問所欲如此五十年未嘗一日或改

朱虎殘湖州武康縣人家貧事母孝一日入山虎負之去因厲聲曰虎為暴食我所恨母無託爾天道可無祐乎虎忽弃之於地而走如有疾驅之者

許愈宣城人家世儒學父養高不仕愈事父以孝謹聞供給甘旨晝夜不怠父之所欲雖千里必致之或隨計偕安輿扶持與妻子共食麤糲晨夕事父必盡珍異父年垂八十謂曰視汝登科足矣祥符七年果登進士第

成象渠州流江縣人母疾割股肉食之母卒廬墓一日
三時培土虎豹環其廬而臥象無懼色

商人張氏居越州郭內余與同過姑蘇盤有鮑羹不食

吳人謂之
黑鯉魚

問之曰適禹祠逢事鬼者言食鮑與鼈當

祭之日祖先不能享懼其馱氣也聆其言遂絕口妻
子亦不許食之

王礪南京人策名起家歷典八郡為性至孝五子登科
二十孫自狀元堯臣而下及第務學者相繼

論語說

無友不如已者

友者輔人之仁不可以非其人故仲尼嘗曰吾死商也日進賜也日退商好與勝已者處賜好與不如已者處也

子路惟恐有聞

非止聞夫子之道凡聞人之善言善行皆如是

愚曾辟彥

命者稟之於天性者命之在我在我者修之稟於天者順之愚魯辟嘖皆道其所短而使修之者也

臧文仲竊位

公叔文子與大夫僎同升諸公孔子曰可以為文臧文仲知柳下惠之賢而不舉孔子謂之竊位由此觀之君子以薦賢為已任

子貢言夫子不可及

子貢之言甚而言之也孔子固學於人而後為孔子

愚按子貢闢毀孔子者故極言之安定恐後學待孔子太高而自絕於不可學故又為之說如此

孔子稱冉求可使為宰又鄙為小子

冉求有為政之材故曰可使為宰及其聚斂不合正道故曰小子鳴鼓而攻之可也如美管仲之功則曰如其仁如其仁至於鄙管仲之僭則曰管氏而知禮孰不知禮

有德者必有言有言者不必有德

古之取人以德不取其有言言與德兩得之今之人
兩失之

孔子見互鄉童子

取以一時之能而不責以平生之行

墓誌

石待舉字寶臣新昌人曾祖祖皆仕錢氏父渥有賢行
君幼而奇俊灑落天聖五年登進士第慶厯四年通
判保州有武臣韋貴者本侯家奴以主恩得官至保

州管雲翼軍激變石君死之子行之世祿延之東之
皆進士

將仕郎湖州長史李君諱軻四預鄉舉慶厯六年釋褐
授湖州長史銘歎其仕晚位卑

先生胡氏名瑗字翼之泰州人累舉不第景祐中
以白衣召論樂仕至太子中允為天章閣侍講嘉
祐元年卒年六十七葬湖州何山先生寶元初始
以一命主學東南訓誨諸生過於父兄之訓子弟

諸生有善若已有之諸生有過若已蹈之東南之人知以經行為先道德為本實先生始之也皇祐初來主太學四方之士趨之唯恐其後具說謂古者先王養而後仕後世仕而不養況自孔孟歿師道不振故憤然獨立不顧毀譽勤勞三十年以教育天下之才為已仕其學以體用為先在湖學有經義齋治事齋治事者人各治一事如邊防水利之類其在太學有好尚經術者好談兵戰者好文

藝者好節義者使各以類羣居講習其從游前後
二千人其高弟則錢藻之孫覺范純仁錢公輔顧
臨吳孜徐積滕甫其著書則有易書中庸義洪範
義景祐樂議紹興九年錢塘關注又錄先生言行
二帙

師道之廢正學之不明久矣宋興八十年安定胡
先生泰山孫先生徂徠石先生始以其學教授而
安定之徒最盛繼而伊洛之學興矣故本朝理學

雖至伊洛而精實自三先生而始故晦菴有伊川
不敢忘三先生之語震既讀伊洛書抄其要繼及
其流之或同或異而終之以徂徠安定篤實之學
以推發源之自以示歸根復命之意使為吾子孫
毋蹈或者末流談虛之失而反之篤行之實泰山
書世少其傳其畧見徂徠作泰山書院記云

黃氏日抄卷四十五

欽定四庫全書

子部

黃氏日抄卷四十六

詳校官中書臣康綸鈞

刑部郎中臣許兆椿覆勘

總校官進士臣楊懋珩

校對官庶吉士臣侍朝

膳錄監生臣姜今熙

欽定四庫全書

黃氏日抄卷四十六

宋 黃震 撰

讀史一

史記

五帝紀

遷之紀五帝自謂擇言之尤雅者著于篇其存古之意厚矣然黃帝殺蚩尤與以雲紀官纔一二事若封禪事已不經至顓頊帝嚳紀皆稱頌語非有行事可考唐虞

事雖頗詳皆不過二典所已載然則孔子定書斷自唐虞至矣何求加為

夏紀

夏紀多櫟括禹謨禹貢之書少康中興書所缺者亦缺自仲康帝相少康直以世次相承若守文無事者意者少康之事遷時已無所考歟若禹後於舜者也謂皆黃帝子孫舜去帝七世而禹反四世又舜帝族也而側微至此皆事之不可曉者

殷紀

殷紀亦依仿書為之具載興衰相乘者數四未嘗不本於賢者之用舍而載紂取亡之事尤詳真可為萬世戒惟湯誥與書本文無一語類及盤庚誥民三篇謂為小辛世殷衰百姓思盤庚而後作難考耳

周紀

公劉遷豳據紀謂其子慶節之事載武王伐紂事其跡頗膠視所謂湯既勝夏諸侯必服乃踐天子位難易輕

重不佞矣祭公謀父諫穆王征犬戎書甚悉芮良夫諫厲王好利召穆公諫監謗皆盡言無隱三代之直猶有存者歟宣王為太子時流彘之難穆公匿之家以子代其死忠勞難于丙吉之護宣帝矣幽王溺褒氏周之存亡遂決東遷以後無復足云

秦紀

愚觀秦事不忍言矣然穆公以善用人而始興二世以信讒諛而遂亡雖以無道劫天下而國之興亡係乎人

亦斷斷乎不可易也太史公援賈誼言責子嬰不能守
全秦余始讀之疑焉及觀班固永平之對果闢其為誤
然固謂始皇得聖人之威恐亦身不免于誤耳始皇果
得聖人之威則何全秦之難守哉

項羽紀

再見
漢抄

遷以羽嘗宰制天下而紀之秦漢之間疑已過矣然既
君之而又字之抑揚之義豈有在歟

世謂羽與漢爭天下非也羽曷嘗有爭天下之志哉羽

見秦滅諸侯而兼有之故欲滅秦復立諸侯如曩時而
身為盟主爾故既分王即都彭城既和漢即東歸羽皆
以為按甲休兵為天下盟主之時不知漢之心不盡得
天下不止也身死東城不過欲以善戰白於世略無功
業不就之悲而漢之心羽終其身不知羽曷嘗有爭天
下之志哉

世罪項羽不用范增而謂增人傑增豈人傑也哉增勸
項氏第一事惟立楚懷王孫心而冒懷王舊號稱懷王

耳然不知此項之所以滅也陳涉當秦方全盛莖草不驚時以適戍亡命一時倉皇舉事慮無以號召人心謂秦欺懷王而滅之人心所共不平故不得已託楚自名若梁籍時豪傑已蝟起要惟有道者是從萬民爭起而掄其命要惟不嗜殺者是歸豈必楚也哉而乃舉牧羊之豎繆謂已死可悲之主設虛偽以愚天下不惟天下不待此而後從項而項氏之滅反由此始矣何則項世楚將也懷王立則項當終其身為驅馳增謂梁與羽能

堪之否乎必不能堪則將置懷王何地乎利於今而不便於後智者猶將徐審而不敢為況於今本無賴而於後無以處者乎使增當是時稍知仁義之說隨宜正誅以殺項氏嗜殺之勢則一時畏懼已服之心必將轉而為悅服之心豪傑必不以次引去何以置楚為今乃不然無故以弁髦視楚心而無故遺項氏以弑逆之機使高帝定三秦則曰如懷王之約三秦既定東嚮百戰爭天下以至垓下之圍則皆曰為義帝復讐漢之滅項終

始以懷王為說是增之偽立懷王者不足為楚地適足為漢地蓋懷王立則羽不能不弑逆羽弑逆則羽不容不滅自增此誤雖有智者不能為羽計矣至若明知天命在漢而猶日夜勸羽殺漢王則尤愚夫婦人之見尚足與之圖大事乎且增終始項王之側不聞嘗直諫一語而項王嘗違之羽欲坑外黃因十三歲兒一語即止羽豈不可諫者增不諫其殺而反勸之殺曾外黃小兒不若而謂羽人傑可乎然世謂增人傑者蓋由高帝自

謂能用三傑而謂羽有一范增不能用故因亦以人傑歸羽愚謂高帝此言特指鴻門逃虎口一事增豈人傑也哉

湯武身致大業自餘小小成立未有不由已出而可受成於人者身不能有為而他人借之以立名身之見殺必矣嬰母之止嬰豈獨以世未嘗貴以非出于嬰之身致也楚懷之孫曰心者一旦安受義帝之名曾婦人之見不若遣沛公入關以諸老將之言而得之擢宋義為

卿子冠軍以高陵君顯之言而失之隨聲遷就何足論
懷王賢否

枝梧

枝者小柱
梧者邪柱

○轅門古者行軍以車為營兩轅相

向為門

○鯁生之鯁

上聲據注
當是姓

○擠

音濟

○未傳之傳

音附

古者二十三歲附籍五十六歲為老老弱未傳者

指不應徭役之人

高祖紀

高祖初以寬大得遣入關然攻戰始猶齟齬自宛之舍

人陳恢說以約降不殺遂引兵而西無不下者及遙定
三秦已如懷王約無辭可以復東用董公仁義說為義
帝發喪復讐卒併天下

隆準之準

音拙

○紹

音殆

○休告之告

音嗥

○求盜者亭卒

之稱○白帝子注謂指秦時葉碧菴先生以為西楚○

跳於滎陽之跳

音逃

建瓴之瓴盛水瓶也○

淠

音帛

呂后紀

惠帝立七年名惠帝子者踐阼復二人史遷皆係之呂

后意者示女后專制之變也然呂氏盡殺高帝子孫在內者欲奪天下而歸之呂大逆無道漢之賊也豈止專制而已而可紀之哉遷為漢臣子特微辭見意爾

呂后欲王諸呂王陵力爭可謂社稷臣矣平勃阿意王之勃雖卒誅諸呂安劉氏然已功不贖罪若平又何以贖之而反受賞邑三千戶金二千斤耶平平生教帝詐無益成敗之數天下既定誤帝偽遊叛者九起卒死於兵今復負帝於身後如此平真漢之罪人哉

留侯子張辟疆年十五揣知呂后意勸丞相拜諸呂將
南北軍入宮居中用事雖曰早慧實留侯不肖子使非
漢方興未艾賣漢天下者爾

漢氏已絕而復續分王子弟力也不然而盡聚之京師
殲於呂氏婦人之手無噍類矣

呂后殺其子孫而欲帝母家使母家無少長皆斬而身
亦死于崇禍史遷備著之為萬世女后戒

後九月閏九月也

○培兵之培音仆

文帝紀景帝紀武帝紀

文紀所載皆恭儉愛民之事一制詔必具以其皆由惻
怛之言也景帝特載其政事之常災異之變制詔
不錄之矣至武帝則始終備具著方士之欺謾他
不及焉

武紀皆取封禪書為
之或褚先生所補

文帝遺詔短喪議禮者譏焉然觀文帝惻怛為民惟恐
妨之至死彌篤在帝不失其為厚為景帝者所宜如禮

不可苟徇其言自流于薄爾後世不以為譏而反譏文
帝何哉

封禪書

封禪之書起于求神仙狂侈之心遷作封禪書反覆纖
悉皆以著求神仙之妄善矣而猶牽合郊祀巡狩古帝
王行事之常以證封禪何耶

方士之說惟以黃帝乘龍上天為誇武帝巡行親行黃
帝冢而祭之方士尚何辭而從者復遁其說為葬衣冠

主暗臣諛一至此甚悲夫若衣冠不必葬葬衣冠無此理則論衡嘗有辨

河渠書

河決瓠子而南田蚡食邑鄒居河北利之進說其君不復事塞者二十年其後天子親臨羣臣從官自將軍以下皆負薪寘之而水復禹迹無後災近臣之蔽君與君臣之率作興事成敗之相反類如此豈獨水利哉

平準書

平準者桑弘羊籠天下貨官自為商賈買賣於京師之名也蓋漢更文景恭儉至武帝初公私之富極矣自開西南夷滅朝鮮至置初郡自設謀馬邑挑匈奴至大將軍驃騎將軍連年出塞大農耗竭猶不足以奉戰士乃賣爵乃更錢幣乃算舟車而事益煩財益屈宜天下無可枝梧之術矣未幾孔僅東郭咸陽乘傳行天下鹽鐵楊可告緡徧天下得民財物以億計而縣官之用反以饒而宮室之修於是日麗鑿無為有逢君之惡小人之

術何怪也然漢自是連兵三歲費皆仰給大農宜無復可繼之術矣又未幾桑弘羊領大農置平準於是天子北至朔方東至太山巡海上並北邊以歸用帛百餘萬足錢金以巨萬計皆取足大農又一歲之中太倉甘泉倉皆滿而邊餘穀其始愈取而愈不足於用及今愈用而反愈有餘小人之術展轉無窮又何怪之甚也嗚呼武帝五十年間因兵革而財用耗因財用而刑法酷沸四海而為鼎生民無所措手足迨至末年平準之置則

海內蕭然戶口減半陰奪于民之禍於斯為極遷備著
始終相因之變特以平準名書而終之曰烹弘羊天乃
雨嗚呼旨哉

齊民者無貴賤之稱○樂卿買爵至貴者為從九卿
加樂明其與正卿異○牢盆牢者與之廩食盆者與
之煮鹽器故曰官與牢盆○鈇左趾之鈇音弟徒
計反鐵
為之著左趾代刖也○外繇戍邊也○赤側錢名以
赤銅為郭○赤金銅也故居三等金之末

吳太伯世家

太伯逃吳弟仲雍繼立十九世至壽夢始大通中國幼子季札賢欲立之不可長諸樊立讓之又不可以次傳餘祭餘昧必欲致國季札終不可餘昧之子僚乃立諸樊子闔廬以其非當立也弑僚自立而吳之禍始萌其後闔廬與越戰死其子夫差報越越又報之卒滅吳皆始於札之終讓也嗚呼太伯以三讓而周興季札以三讓而吳亡讓一也可與權之義亦難哉

伍子胥以父見誅於楚而奔吳知闔廬之將弑僚也進
專諸成其事以俟闔廬得政既乃自滅其宗國之楚而
鞭所事平王之尸是既弑吳之君復弑楚之君於身後
報父之讐者如是乎天下豈有無君而有父者哉古人
不共戴天之義恐非所施於所天之君父也且胥所當
怨者費無極也然楚誅之矣夫何甚

越敗吳於檣李今嘉興也吳敗越於夫椒今太湖中椒
山也皆云越地然則越之境至浙水以西歟

姑蘇臺闔廬所築三年聚材五年乃成高見三百里
○虎丘闔廬所葬卒十餘萬人治之下池廣六十步
深一丈五尺葬之三日白虎居其上故號虎丘在吳
縣閭門外○太伯冢在吳縣北梅里聚去城十里皆
注云

齊世家

太公之始封威公之霸諸侯天下莫彊焉田氏卒奪而
有之悲夫慶封崔杼之禍晏子仰天不肯盟可謂疾風

勁草者矣齊太史書崔杼弑莊公兄死弟繼者三至今
凜凜生氣猶足以寒亂臣賊子之膽

魯世家

史載周公作鸛鶚於東土既定已作嘉禾之後載成王
泣反周公事以謂人或諧周公周公奔楚成王發府見
周公揃蚤禱成王闕病之策而然且謂啓金縢書又周
公卒後之事皆與詩書不合

魯弊於三桓三桓皆桓公子莊公弟也長曰慶父次曰

叔牙次曰季友莊公無嗣欲立庶子班叔牙欲立慶父
季友鳩叔牙而立班慶父殺班立閔公既又弑之季友
殺慶父立僖公而相之故三桓季氏尤強文公薨襄仲
又殺適惡及立庶倭是為宣公魯君由此失國政歷文
至襄而三桓分魯為三軍昭公見逐卒于乾侯孔子相
定公嘗毀三桓城收其甲兵及季桓子受齊女樂孔子
去魯其後哀公立復見逐悼公而後益卑九世至頃公
卒為楚所滅

季文子相三君

宣成襄

家無衣帛之妾廐無食粟之馬君

子謂其廉忠然私室日強公室日卑自若也愚謂行父
能自毀城郭去兵甲退安臣子之分如孔子之所以謀
魯則身為卿相雖妾衣帛馬食粟未害也

洙泗之間斷斷相讓夫子嘆魯道之衰蓋非安行自然
之俗則人心漓矣

燕世家

文王易王之世蘇秦謀燕蘇代誤子噲讓國子之而燕

亂昭王用樂毅中興艱難極矣惠王忌賢不念厥紹王
喜方自救不暇反用栗腹敗趙以自敗其從豈必冉軻
之謀而後燕滅哉

管蔡世家

管叔誅死無後蔡叔之子仲率德改行而復封且為周
卿士然其子孫微甚哀侯不敬息夫人而死於楚繆侯
怒已嫁齊威之女弟而虜於齊靈侯弑君自立而滅於
楚國不競亦凌矣猶未甚害也昭侯耀美褻於楚取禍

子常自是讐楚而附吳遷於州來臣下不附閱四世楚滅之矣

曹叔鐸之後共公成公虜於晉悼公囚於宋隱靖二公更弑迎立已無以為國矣伯陽復好獵用公孫彊背晉干宋而宋滅之使國人之夢遂符叔鐸無所置力於冥冥中矣悲夫

陳杞世家

陳舜後也國微甚然敬仲奔齊子孫卒代齊有國彊於

天下果符周太史之占而晉太史趙亦謂且盛德之後必百世祀豈不異哉近世朱文公則謂太史之占陳氏子孫設為之辭以欺世蓋符命之類也

杞微小不足稱述史遷以禹之後特錄之又言楚惠王滅杞而越王句踐興蓋越亦禹之苗裔

衛康叔世家

衛獻公亡在外十二年而入稱後元年出公亡在外四年復入亦稱後元年漢文之稱後元其殆昉於此歟

衛君多亂文公處國家覆亡之後獨能輕賦平徭身自勞與百姓同苦卒以治稱一國以一人興信夫

衛靈公之生其母夢其為康叔

秦置東郡徙衛野王縣二世始廢君角為庶人而衛祀絕然則衛雖微其亡獨後于諸國且子孫保首領愈於戮辱者多矣

宋世家

世家之首併叙三仁明微子歸周之本心者善矣宣公

舍子與夷而立弟穆公穆公不敢忘德將死復立與夷
為殤公殤公立十年十一戰而宋始亂是穆賢而殤不
肖甚明宣之讓賢也甚公亂不始于宣之讓也史譏宣
公廢太子而立弟國以不寧者十世春秋之世無寧國
豈皆讓使之然歟其後襄公讓弟目夷不果襄公卒以
不用目夷之言而敗向使目夷為之君宋未可量也讓
豈階亂之舉哉當是時人君溺私愛廢嫡立庶或以弟
弑兄而攘其國子孫干戈相尋者總總也史不之譏而

譏宋宣之讓何也且襄公初欲讓國目夷不果則相之知其賢於已也而卒不用知賢而不能用襄蓋妄人耳史反多其禮讓又何歟熒惑守心景公憂之司星子韋勸其移于相不可移于民不可移于歲又不可于韋稱天高聽卑君有君人之言三熒惑宜有動候之果徙三度感應之機何速耶王充論衡嘗斥其妄殆正論也

太史公稱襄公修仁行義其大夫正考父美之追道契湯高宗殷所以興作商頌注謂韓詩商頌亦美襄公殆

有據之言歟然與今詩序不合而詩序作於衛宏在太史公後蓋毛韓之傳不同爾

史載宋昭公四年敗長翟緣斯於長邱而魯世家稱當宋武公之世武公實為昭公九世祖是史自為矛盾也今考魯世家文公十一年獲長翟喬如而追載宋武公獲長翟緣斯之事緣斯者喬如之祖也宋昭公之四年正當魯文公之十一年是獲喬如之歲非獲緣斯之歲也緣斯于喬如為祖則獲緣斯者為宋武公非宋昭公也

二事參考則魯世家所載近是宋世家所載非是也注者以為未詳或者世次尚差當缺疑歟長翟之國名鄭瞞喬如敗於魯焚如敗於晉榮如敗於齊簡如敗於魏鄭瞞由是遂亡其敗於齊當惠公二年穀梁稱長翟身橫九畝斷其首而載之眉見於軾云

阮音耆國名疑即西伯戡黎之黎也○琴操之操蓋取處幽困不改其操之義見箕子操注蓋琴音多以寫幽困之懷也

晉世家

穆侯名太子曰仇少子曰成師仇為文侯傳子昭侯封
成師於曲沃沃強大亂晉六世而卒併之為武公生獻
公嬖驪姬復亂三世而文公入晉始霸襄公有穀之師
靈公無道趙氏弑之歷成至景作六卿厲公見弑悼公
復興昭公以後政歸六卿矣

晉文侯當周東遷有功平王錫文侯有文侯之命此一
時也其後晉文公入周襄王及獻楚俘天子使王子虎

命晉侯為伯賜大路弓矢秬鬯此又一時也史遷乃取文侯命屬之文公之下義和者文侯字也注者又云能以義和我諸侯誤益誤矣

漢時恐此書未出

黃池之會吳晉爭長而史於吳世家曰長晉於晉世家

曰長吳自相矛盾未知孰是

趙世家亦曰吳長

獻公嬖驪姬殺適立庶而荀息乃以身徇之長君之惡以成其亂陷奚齊卓子於死地皆息之罪也史乃許息不負其言息固不負其言矣如負國何夫等死耳使息

能以死諫君豈不忠且偉歟

悼公十四歲得國一旦轉危為安功業赫然漢昭帝流
亞也太史公乃言悼公以後日衰語焉不詳悼公稱屈
九原矣

楚世家

楚之先出自顓頊有鬻熊者事周文王成王封其後熊
繹於楚至熊通自稱武王子文王自丹陽徙都郢國始
強傳成王益彊子商臣弑之商臣自立為穆王及莊王

立淫樂三年不聽政且曰諫者死伍舉蘇從冒死以諫
幡然而改凜凜如太阿出匣所嚮莫敵而能折節服義
嘗問鼎以王孫滿之對而歸嘗縣陳以申叔時之言而
復之鄭伯袒以逆則退師華元告以情則釋宋較之荆
楚諸君此善於彼多矣共王敗於晉射中目康王沒公
子圍弑郟敖自立曰靈王盟諸侯囚慶封就章華臺而
國人怨叛卒餓死申亥之家平王以詐弑初王竟續楚
祀而乃信費無忌之讒亡太子殺伍奢昭王之世奢子

胥挾吳入郢鞭尸以報國幾亡自是吳日侵徙都郢至
惠王而太子建之子白公勝復為亂賴葉公國再安然
是時吳為越所滅楚東廣地至泗上歷五世至威王滅
越地益廣矣懷王乃甘受張儀之欺而死於秦五傳至
負芻秦卒滅之

靈王之族慶封也以封徇曰無効齊慶封弑其君而弱
其孤以盟諸大夫封反曰莫如楚共王庶子圍弑其兄
之子員而代之立軍人粲然皆笑嗚呼君子無諸已而

後非諸人可不謹歟

昭王名琤越世家以為名軫○楚武王墓注稱秦項
赤眉之時欲發之輒頽壞填壓不得發愚往歲聞蜀
人趙同年子發謂先主武侯墓不可發近見酉陽雜
俎載唐有人發先主墓者遇怪不敢以此證彼皆合
勢或有之歟

越世家

句踐勤苦踰二十年一旦沼吳以雪會稽之耻其志何

如哉范蠡功成身退徙齊徙楚復皆顯名于天下材識
卓卓乎春秋戰國之上矣向使不以致產自見而退逸
山林豈不誠有道之士耶

鄭世家

鄭小國介於晉楚服晉則楚伐服楚則晉伐至簡公世
兩親晉楚及子產為卿國安靜者數十年賢之有益於
人國如此夫此鄭人哭其死如親戚而孔子亦泣其為
古之遺愛也

趙世家

蜚廉二子長曰惡來其後為秦次曰季勝其後為趙造父封趙城始得氏叔帶當幽王時去周如晉風事獻公衰事文公盾事靈公至景公世趙朔益專晉滅趙氏孤兒趙武後復為正卿生趙簡子滅范中行氏子無恤為襄子平代地滅智伯趙視韓魏最強六世至武靈王變胡服滅中山攘地北至燕代西至雲中九原欲南襲秦強於天下矣愛吳娃立其子何長子章作亂餓死沙邱

自是無能君當孝成王時秦伐韓上黨趙受上黨守馮
亭之獻故有長平之禍趙可禦秦者惟頗牧耳樂乘用
而頗亡郭開讒而牧誅趙實自趣其滅於秦何尤

史載晉滅趙之族朔妻成公姊有遺腹匿公宮生武公

孫杵臼與程嬰以死保脫之越十五年因韓厥得復田

邑而左傳稱武從姬氏畜于公宮以其田與祈奚韓厥

言於晉侯曰成季之勲哀宣孟之忠諡而無後為善者

懼矣乃立武而反其田焉是無程嬰杵臼之事也未知

孰是然恐育於公宮者近之若謂賊搜及公宮何甚耶
中山者西周桓公之子趙獻侯十年初立魏文侯嘗
滅之後滅於趙

烈侯好音欲賜歌者田各萬畝得牛畜荀欣徐越三
子而止歌者田然則中主寧有常好而賢者之能變
化人主氣質功亦大矣顧恐戰國之言多誇爾○左
師觸龍之說太后俾入長安君質於齊其幾諫之類
歟○簡子夢至帝所襄子得霍太山朱書將興之禎

祥也孝成王夢乘龍上而墜將亡之妖孽也恐隣於怪耳

魏世家

畢萬本周同姓事晉獻公封魏魏武子從重耳反國絳
事悼公九合諸侯戎狄以和獻子身為國政桓子共滅
智伯文侯尊賢重士得譽諸侯秦不敢加兵武侯之世
國尚強惠王好戰而國危子孫日弊於強秦賴公子無
忌合從五國國粗立然不能盡用其說無忌卒國不支

以至於亡

韓世家

韓亦姬姓本無大功於晉厥以鞏之役勝齊得預六卿
子孫無聞人惟昭侯相申不害國以治諸侯不侵伐不
害死秦拔宜陽旱作高門功業不終其後日弊於秦矣

田敬仲世家

陳佗之子完奔齊為田氏田乞及常皆以大斗予小斗
收愚齊民以結其心再世弑逆專其國政而陰奪之蓋

不待田和遷康公自立而太公之齊已為田氏有久矣
然威王烹阿封即墨國治強於天下湣王雖卒破於燕
亦伐宋割楚侵三晉泗上諸侯稱臣襄王破燕復齊王
建四十餘年不受兵五國既滅秦方一旦談笑而取之
考論始終戰國諸君其強皆無齊比彼以區區智數攘
竊人國而子孫之盛若此何耶豈有媯盛德之後宜然
耶周太史之占齊懿仲之卜豈或有之耶抑人衆而勝
天者耶

孔子世家

史記世家為有社稷人民者作也孔子布衣史遷以附諸侯王之後且贊之曰天下君王至於賢人衆矣當時則榮歿則已焉孔子布衣至今學者宗之其意尤抑彼而揚此嗚呼吾夫子天而人者也能模寫其盛者惟子思中庸數語及本朝伊洛考亭諸儒若史遷之贊蓋世俗之見猶唐人尊以王爵爾豈知夫子者哉然漢世重道家學而輕儒遷之家庭授受本亦知有道家耳而猶

知尊慕之若此此孔子之所以為大歟世家載孟釐子
期夫子為達者而述其先世正考甫之鼎銘曰一命而
僂再命而偃三命而俯循墻而走亦莫敢余侮釐於是
粥於是以餬余口又載老子送夫子之言曰聰明深察
而近於死者好議之人者也博辯廣大危其身者發人
之惡者也嗚呼然則士君子之涉世當如何其自畏耶

陳勝世家

再見
漢抄

勝自王六月而亡然其所置遣侯王將相竟亡秦

外戚世家

史於呂氏譏以非天命孰能當之於薄氏稱仁善於竇

氏稱退讓至王信好酒田蚡勝

王后異父弟

貪巧則武帝母

王太后之戚衛青號大將軍霍去病

衛后姊之子

號驃騎將

軍則武帝妃衛皇后之戚勸戒昭然而外戚之歛肆亦
係於時君矣

衛青本平陽公主家使令者青一旦富貴振天下卒尚
公主然謂非公主失身不可也

為武帝生子者其母無不譴死褚先生贊其為聖賢事
雖曰有感之言亦豈人情也哉

余家素貧厄少時以外侮告先人輒令勤學云丈夫
當時富貴百惡滅除蓋常常而然言猶在耳也而不
知所出今閱褚先生衛皇后贊見其語為之感愴哽
噎云

楚元王世家

再見
漢抄

楚王戊趙王遂皆以不用諫謀反誅漢復立劉禮王楚

元王祀趙以竇太后不許絕

巨嫂即丘嫂

漢書稱丘

羹頡侯母

荆燕世家

漢分王同姓惟荆王賈以功封其後擊黥布死

田生以畫干營陵侯劉澤澤子生二百金生歸齊明年
澤使人謂生曰弗與矣生乃如長安不見澤而以計謁
高后之所幸張子卿使王諸呂以張本而王劉澤於燕
然則田生所干劉澤之畫即明年所施於張子卿之計

曰弗與云者弗與我施行所畫促之之辭爾澤劉氏也而王諸呂乃出其計其罪大矣故太史公之贊曰劉澤之王權激呂氏而釋之者弗察謂畫為計畫謂與為黨與夫於干劉澤不言其所畫而於干張子卿言之文法之相為先後如此而釋之者弗能察故夫史遷之文深遠矣

齊悼王世家

高帝長庶男劉肥封齊朱虛侯章誅諸呂者其次子齊

最大其後分七國云

吳楚反時齊路中大夫既許三國而終達漢天子命俾齊堅守與解楊之事同

主父偃求徐甲欲入其女齊後宮不遂則讒齊王殺之亦卒以此坐誅偃真小人哉

蕭相國世家

高帝起布衣得天下非有分義素服人心故所與同起者帝無不疑之至如關中天下根本何每留守而帝自

將帝所任者莫如何所疑者亦莫如何也方帝距京索
間非用鮑生計遣子孫詣軍何幾族及自將邯鄲非用
召平計悉家財佐軍何幾族其後自將擊黥布非用說
客計多買田宅自汙何又幾族然則何雖相帝定天下
嘗懷救死之不暇縱何非刀筆吏又何暇經綸之事乎
其後為民請死稍欲展布而械繫已及帝之赦何也言
我不過為桀紂而相國為明相是正怒其掠主譽以得
民心也嗚呼其亦異於古人所以推誠共治之道哉

曹參世家

再見漢抄
後多類此

參自高帝起兵無一戰不預雖非赫赫功而未嘗以敗
聞天下既平猶從擊陳豨黥布蓋參與帝終始兵間而
不見疑相齊齊治相漢漢治參有大過人者矣而史論
戰功則謂之當信之滅論治功則謂其當秦之後若有
抑揚之意焉愚謂參明哲保身雖信不能及而立法易
守法難參以人豪一遵何約束吏皆木訥而深刻者
輒斥去所以養成漢家寬厚之風雖何無以尚之參其

可少哉書稱斷斷猗無他技參之謂矣傳稱惟仁人能
好人能惡人參庶幾焉

留侯世家

利啗秦將旋破嶢關漢以是先入關勸還霸上固要項
伯漢以是脫鴻門燒絕棧道激項攻齊漢以是得還定
三秦敗於彭城則勸連布越將立六國則借箸銷印韓
信自王則躡足就封此漢所以卒取天下勸封雍齒銷
變未形勸都關中垂安後世勸迎四皓卒定太子又所

以維持漢室於天下既得之後凡良一謀一畫無不繫漢得失安危良又三傑之冠也哉然董公仁義正大之說則良不及之使以良之智兼董公之識而為漢謀伊周何尚焉

陳丞相世家

陳平智有餘信矣惜皆流於小人之術耳方楚漢爭雄時平惟有反間楚一事然是時楚勢已促縱增不去亦俱死垓下耳反間何等語而可汙龍興之漢使單于闕

氏此張儀愚鄭袖之故智也何奇之云使平早計而帝
毋窘平城雖不奇猶奇矣從攻陳豨黥布凡六出奇計
然使豨布反者平勸偽遊雲夢之失也平與太尉勃合
謀卒誅諸呂然使諸呂逆者平阿意太后之過也縱火
人之家而隨以撲滅言功功耶罪耶代右相勃決獄錢
穀之對徒以大言勝勃平無其實也董晉有言天下安
危宰相之能與否可見謀議於上前者不足道平一時
欺君之言後世猶或稱之誤矣始平自以多陰謀懼多

陰禍以此足覘其本心云

絳侯世家

周勃從高帝終始兵間晚尤多戰功高后歿手誅諸呂
迎立文帝功孰大焉厚德如文帝疑謗一開微太后幾
族甚矣功名之盛難居而嫌隙之微當戒也亞夫尤重
厚守正平吳楚有大功其爭廢太子爭侯王信爭侯降
匈奴徐盧等五人又皆宰相職也反以怏怏疑之卒置
死地景帝尤少恩哉

許負相亞夫以從理入口果饑死

梁孝王世家

孝王既僭侈矣景帝復失言千秋萬歲後傳於王入則同輦出則同車卒之梁王賊殺袁盎等大臣幾至變逆者景帝之失也梁王車服擬天子珠寶踰京師卒以憂死五子分王皆國絕富貴者可以觀矣

五宗世家

景帝子十三王惟河間王德被服造次必於儒者餘皆

驕庸然吳楚反後亦皆奪之權而國遂貧矣

膠西王
端賊戾

三王世家

三王者武帝子齊王閔燕王旦廣陵王胥也太史公備述羣臣奏請皇帝恭讓始終啓復之辭以及三王封策之辭爛然可觀也而不載其行事褚先生條釋其後謂齊王之國左右維持以禮義不幸早夭謂廣陵王果作威福謀反自殺謂燕王謀為叛逆亦自殺皆如其策指云愚按齊王策曰允執其中天祿永終永終者堯戒舜

之反辭云四海困窮則天絕其祿不執中者也今乃用
為期望之辭屬之執中之下誤矣豈亦王早天國絕之
先兆耶

青社字出齊王策蓋泰社備五色土齊東方封以青
土故曰受茲青社

列傳

伯夷

自此後漢
抄無之

太史公疑許由非夫子所稱不述而首述伯夷且悲其

餓死為舉顏子盜跖反覆嗟嘆卒歸之各從其志幸伯夷得夫子而名益彰其趣遠其文逸意在言外詠味無窮然豈知其心之無怨耶

堯讓許由蓋莊周寓言眇天下為不足道耳太史公疑箕山上有許由冢愚意雖無其事嘗有其人歟

載伯夷父死不葬之語與武王十一年伐紂事背馳然漢人舊說以武王上繼文王受命之九年為十一年故云爾

管晏

世之人見賢而稱其賢見智而稱其智未足言知人惟
其人方困窮時其迹有甚於不賢不智者而已獨有以
察其心若鮑叔之於管仲千古一人耳然愚謂此管仲
之為管仲也君子固窮窮視其所不為貧視其所不取
何至蒙不賢不智之迹耶其令論卑而易行其政善因
禍而為福太史公此論固切中其相齊之要領實則苟
於濟事不暇顧在我之正守已占於貧賤之時矣晏平

仲功業不及管氏而相三君妾不衣帛則廉節過之越石父稱拙於不知已而信於知己蓋名言也宜晏子之敬待然景公欲相孔子嬰實沮之石父豈賢於孔子哉

老子韓非

老子與韓非同傳論者非之然余觀太史公之旨意豈苟然哉於老子曰無為自化於莊子曰其要本歸於老子之言於申不害曰本於黃老而主刑名於韓非曰喜刑名法術之學而其歸本於黃老夫無為自化去刑名

固霄壤也然聖人所以納天下於善者政教也世非太古矣無為安能自化政教不施則其弊不得不出於刑名此太史公自源徂流詳著之為後世戒也

老子孔子皆布衣也太史公列孔子世家贊其為至聖至老子則傳之管晏之次而窮其弊於申韓豈不以申韓刑名之學又在管晏功利之下而老子則申韓之發源歟班固謂遷論大道則先黃老而後六經或者未之深察也

司馬穰苴

田氏孫子武吳起

穰苴之斬莊賈孫子之斬二姬蓋號令嚴肅雖素卑賤者可將雖素不知兵者可使也太史公譏孫臏策龐涓明矣然不能蚤救患於被刑吳起說武侯以形勢不如德然行於楚卒以刻暴亡其軀嗚呼不仁而善用兵亦烏有自全者哉

伍子胥

子胥諫吳伐齊而勸伐越吳不用國遂亡然諫至再三

弗聽矣。讒人太宰嚭在王側，又與之有隙矣，不能去而之。他反私託其子於齊之鮑牧而歸，以取屬鏤之誅。何謀？吳之明若是，而乃謀身之暗耶？初，子胥鞭平王尸，申包胥責其已甚，答以日暮途遠，故倒行而逆施。君子是以知其不終也。

屬鏤之鏤

錄于切

○鴟夷革者，取馬革為鴟夷。鴟夷，槩

形也。

胥山張晏注在太湖邊。

仲尼弟子

受業身通者七十七人有年名見書傳者三十五人餘
四十二人止存名氏

子貢一出存魯亂齊破吳彊晉而霸越雖曰存魯不幾
已甚歟其機辨儀秦不及也將史之言未必盡然歟結
駟連騎謝原憲於藜藿間而終身耻其言之過於是名
教之樂為不可尚已

公皙哀字季次子曰天下無行多為家臣仕於都惟季

次未嘗仕

曾點之點作歲巫馬期之期作施

商君

商君之術能彊秦亦秦之所以亡能顯其身亦身之所
以滅然則何益矣

蘇秦

秦約從六國忠於六國者也齊魏首敗從約伐趙秦以
利害忠告齊魏不可而去之則身名始終矣乃請使燕

以報齊食齊之祿而反誤之不忠孰甚焉又豈約從之初意哉嗚呼茲其所以及歟蘇代私於子之誤燕已甚復欲為燕約諸侯宜其終不逮秦也

張儀

蘇秦之說六國為六國也張儀之說六國非為六國為秦也欺詐諸侯如侮嬰兒雖均之捍闔而儀又秦之罪人矣然儀之入秦蘇秦實使之雖欲止秦兵於一時而卒以伐從約於異日智者不為也夫儀秦友也儀始謁

蘇秦以故人求益也秦不以情告儀使共謀六國以緩秦兵而直以權詭激之入秦自貽後患何耶將儀之多詐不可告以情抑秦自以不及儀與之共謀六國慮軋已耶夫縱橫之士固不可以常情槩之也

陳軫公孫衍皆惡於儀軫奔楚復從容於秦儀死而衍入相秦嘗佩五國相印為盟約長皆權變無窮之士也

樗里子甘茂

樗里子秦惠王弟名疾滑稽多智號曰智囊

晁錯之名
恐本於此

為惠王將多戰功為武王相使周周敬之其後為昭王
伐蒲衛邑胡衍受蒲金說之而去宣智有時而窮歟然其
言曰後百歲當有天子宮夾我墓至漢興長樂宮在其
東未央宮在其西此豈智料之所能及或者攻數學歟
否則傳者妄也

甘茂相秦拔韓之宜陽其後勸秦子韓茂遂懼向壽公
孫奭之讒奔齊使楚卒於魏其孫甘羅年十二為秦使
趙廣河間之地秦封甘羅為上卿復以甘茂田宅賜之

穰侯

穰侯魏冉者秦昭王舅也立昭王昭王諸兄弟之不善者滅之威震秦國握將相之權三十年歲伐三晉以廣地天下皆西鄉稽首其後越三晉以攻齊范雎譏其非遂以遠交近攻之策說昭王奪之位而穰侯斥矣

白起王翦

白起以穰侯薦為秦將其斬殺之數多而載於史者凡百萬不以數載者不預焉長平之役秦民年十五以上

皆詣之而死者過半以此類推秦之死於兵者又不可
以數計也蘇代說應侯間之起不復為秦用而賜之死
自秦而言雖殺之非其罪自公理而言一死何以盡其
罪哉

王翦為始皇伐楚面請美田宅既行使使請美田者五
輩後有勸蕭何田宅自汙者其計無乃出於此歟王翦
諸人之輔秦蓋凶德之參會古今之極變不可復以常
事論也太史公譏翦不能輔秦建德而偷合取容嗚呼

是何異責虎狼之不仁耶

孟子荀卿

太史公之傳孟子首舉不言利之對歎息以先之然後
為之傳而傳自受業子思之外復無他語惟詳述一時
富國強兵之流與騶衍迂怪不可究詰以取重當世之
說形孟子之守道不變與仲尼菜色陳蔡者同科竒哉
遷之文卓哉遷之識歟蓋傳申韓於老莊之後者所以
譏老莊而傳淳于髡諸子於孟荀之間者所以長孟荀

也荀卿年五十始自趙學于齊三為齊祭酒後為楚蘭陵令春申君死而卿廢卒死於蘭陵葬焉嫉世之濁而鄙儒小拘如莊周等又滑稽亂俗於是著書數萬言此亦能守道不變者故太史公進之與孟子等

堅白異同者注云汝南龍淵水可淬劍故有堅白之論云黃所以為堅白所以為利或辨之曰白所以為不堅黃所以為不利此其為異同嗚呼士論之無稽至此世道如之何而不壞

墨翟之智注稱公輸子將為攻具將攻宋墨子至郢設
拒攻之具凡九屈之

孟嘗君

田文謂其父田嬰相齊三王齊不加廣而家富累萬金
不見一賢者徒厚積以遺子孫而不謀齊文既得政故
招致食客常數千人宜齊之加廣矣然卒以此見忌於
其君而不能安其身乃遺秦穰侯書以自伐其齊又相
魏西連秦趙與燕合兵而幾至於滅齊卒之齊魏亦共

滅文封邑而子孫遂絕豈惟不能廣齊且削齊矣豈惟
不以遺子孫亦無子孫之可遺矣豈惟辱國而亡家且
聚天下任俠姦人六萬家於薛壞薛之俗為暴桀矣譬
之千金之家銖積寸累而致一旦有點慧者出揮金如
土聚闔閭走狗擣博無賴之人以索其家乃號於人曰
吾好客其真好客者耶其不肖者耶周公一飯三吐哺
一沐三握髮好客宜無以加之矣不聞其如孟嘗之好
也然則孟嘗非能好客也田嬰家不幸生不肖子耳吁

平原君好客僅得一毛遂孟嘗君好客僅得一馮驩而
二君者其始皆不能知之尚何以好客為哉愚謂二君
者不足以知二子而二子歸之者以貧無聊如祿仕於
亂世免死而已其後因事而顯殆非二子初心所期也
二君其亦幸而得此二子歟

平原君虞卿

去讒而遠色固尊賢之道也平原君以賓客稍引去乃
斬笑嬖者美人頭雖曰人情所難然已甚矣邯鄲之急

得毛遂以合楚之從得李同募死士以須楚魏之救邯鄲之獲全固平原君力也然向使不受上黨之嫁禍則趙必無長平之敗亦必無邯鄲之圍平原之功於是不足贖誤國之罪矣太史公謂使趙陷長平兵四十餘萬邯鄲幾亡非歟而譙周乃稱長平之陷易將之咎何怨平原吁何惑也

秦攻長平虞卿勸趙附楚魏以和秦而後秦可和趙不聽故秦卒不和而趙大敗其後趙將割六城事秦虞卿

使於齊以謀秦而秦反和趙及魏欲與趙約從則卿亟
勸成之卿無言不効無謀不忠大要歸於結和鄰國以
自重而使秦反輕此至當不易之說也與一時東西捍
闔之士異矣棄趙卿相而與故交魏齊俱困大梁以著
虞氏春秋其必有決烈之見而豈其愚也哉

為卿而食采於虞史不載其姓氏州里○槃散斃貌
意即蹢躅○擔簦之簦有柄之笠

魏公子無忌

無忌用侯嬴朱亥之力竊符矯命以赴平原之急其後
在趙用毛公薛公之諫趣駕歸魏以却彊秦之圍此四
人者皆隱於屠沽博徒無忌獨能察而用之五國賓從
威振天下雖非正道而能為國家之重過平原孟嘗遠
矣然侯生朱亥之詐力又非毛公薛公之正論比也安
釐王受秦反間用無忌不終十八歲而魏亡悲夫

春申君

說秦昭王不伐楚而出身脫楚太子於秦可謂智能之

士矣一策不謹而卒死李園之手與嫪勞毒毒同歸惜夫有朱英之謀而不能何必珠履其客為也

范雎蔡澤

范雎辱於魏齊賴鄭安平王稽竊載入秦離昭王母子兄弟舅甥之親而居相位以快一己之恩讐蓋亦勞矣然卒以任鄭安平王稽二人敗事而罷夫爵祿非酬恩之具也顧材所堪耳況竊之君以私所恩耶范雎以口舌攘穰侯之位而蔡澤復以口舌攘之雎所謂螳螂捕

蟬黃雀在後也然穰侯以君臣骨肉之親則睢攘之也
難范睢當君臣疑阻之際則澤攘之也易睢遠交近攻
之策真有益於秦澤特羈困之餘竊富貴耳澤殆非睢
以離間昭王母子兄弟而得之澤勸睢功成身退心雖
私而論則正矣

禹者曲脚鼎○夏育衛人力舉千鈞此為責育之育
樂毅

樂毅為燕報齊誠師出有名矣而盡取寶物祭器輸之

燕仁義之師不為也。徇齊五歲下七十餘城而莒即墨猶未下者。齊王保於莒有困獸覆車之勢。齊方發憤而毅之師已老彊弩之末不能穿魯縞其勢然也。夏侯玄許以湯武之事何甚耶。然毅以讒去適趙。趙父母國也。報燕惠王書稱忠臣去國不潔其名。不効戰國反覆復為趙而讐燕去就無歟。傳之子樂閒亦然。故高帝過趙復封其孫樂叔者。於樂鄉信義之入於人深矣。然則樂毅非戰國之士也。

汶篁之篁注云竹田為篁

廉頗藺相如

藺相如庭辱強秦之君而引車避廉頗廉頗以勇氣聞諸侯而肉袒謝相如先公後私各棄前憾皆烈丈夫也勇怯各得其所矣然先之者相如也趙奢治賦不少貸平原君之家而平原君因薦之王而用之君子不多奢之行法自近而多平原君之以公滅私也括輕易取敗無足道括母言父子異心之狀可謂得觀人之法李牧

養威持重戰無不勝與頗齊名而頗牧皆廢於讒人郭
開之口趙之亡忽焉悲夫

田單

田單守即墨使妻妾編於行伍間此李同教平原君之
故智也

轄

音衛

車軸頭○畫邑之畫

音獲

魯仲連鄒陽

魯仲連闢新垣衍帝秦之說引鄒魯不肯納齊湣王之

事為證可謂深切著明矣然解邯戰之圍者平原君力也非仲連口舌之所能介也射書聊城使其將自殺而城見屠此不過為田單謀耳縱當時無仲連書聊城無救勢亦必亡亦非甚有功於田單也射書何為哉使連能說單無屠聊而射書於城約其將善降或說燕無殺其將而使其將歸燕以救聊城之命皆可也連釋此不為射書何為哉彼不預吾事而預之是為出位惟不以爵賞自累而輕世肆志焉故得優游天下如飛鳥翔空

然然直以為天下士則未也

鄒陽自陷縲紲諄諄求哀以此得位不其羞哉

屈原

張儀既欺楚原勸殺張儀秦昭王欲與懷王會原諫無
行懷王皆不能用遂至兵挫地削亡其六郡客死於秦
為天下笑原之忠謀亦白矣上官大夫令尹子蘭反讒
之楚而遷原江南原悲憤作懷沙之賦自投汨羅以死
原稱三閭大夫者掌王族三姓曰昭屈原景○離騷者

猶離憂也汨羅者汨水在羅故名

賈生年二十餘仕漢諸律令所更定及列侯悉就國其說皆自賈生發之絳灌等短其紛亂出為長沙王太傅意不自得弔湘賦服召見宣室文帝嘗前席焉頃之拜梁懷王太傅數歲懷王墮馬死賈生自傷為傳無狀哭泣歲餘亦死年三十三

塊軋

音央
音乙

呂不韋

初秦子楚為質於趙不當立呂不韋傾貲說華陽夫人立之是為莊襄王先嘗獻其姬於子楚生子政是為始皇帝遂得相秦專其權而亦卒以此見侵飲酖死

刺客

太史公傳曹沫專諸豫讓聶政荊軻五人謂介然不欺其志愚謂惟豫讓為君報仇之志為可悲餘皆在愚殺身非人情也荊軻所交田光高漸離之流多慷慨輕生至今讀易水之歌使人悲惋軻視諸子材氣殆優焉雖

然果何哉其所謂志而足稱道哉

批逆鱗之批白結反出荆軻傳注

李斯

斯以無道殺天下趙高亦以無道殺斯此天也而自謂以忠死不已愚乎

敵抵即角抵兩兩相當角技用力○指鹿而左右皆曰馬因紿二世齊戒尋遷之望夷宮殺之與秦紀所載小異○高引壘上殿殿欲壞者三與桓玄地陷之

事同

蒙恬

恬自蒙驁世為秦將殺天下而并之秦天下既一恬復
暴師十餘年城塹萬餘里墮山堙谷以除直道同惡相
濟凶德參會死有餘罪矣臨刑不自悟乃歸罪於絕地
脈然則凶人吉其凶彼固安行之不知罪之莫大於殺
也

張耳陳餘

再見
漢抄

耳餘少為刎頸交起從武臣北略趙地武臣敗立趙王
歇秦攻趙張耳與歇保鉅鹿陳餘軍其北不救後張耳
責讓陳餘陳餘解軍印去張耳從項羽入關羽封耳常
山王而封陳餘三縣餘反楚襲常山耳歸漢漢遣耳同
韓信下趙斬餘而耳為趙王

頭會箕歛者以人頭數出穀而以箕歛之○傳

音以

物挿之也○泝水之泝

音

魏豹彭越

彭越有大功無反意既以疑間掩捕論罪遷蜀青衣矣
呂氏又詐使人告其反族之何忍哉

黥布

布起麗山之徒以兵屬項氏嘗為軍鋒得國九江南面
稱孤矣漢使隨何說之歸漢遂滅楚垓下王淮南及信
越誅而布大恐幸姬啟釁竟以反誅愚謂布非反漢漢
非少恩勢使然耳夫越於漢非蕭曹素臣服者比也羣
起逐鹿成者帝敗者族方雌雄未決不得已資之以濟

吾事事濟矣同起事者猶在則此心不能一日安故其勢不盡族之不止也故夫乘時徼危者未有不滅其身惟嬰母之賢為不可及也已

淮陰侯

信虜魏破代

夏說

平趙下燕定齊南摧楚兵二十萬殺龍

且而楚隨滅漢并天下皆信力也武涉蒯通說信背漢而信終不忍自以功多漢終不奪我齊也不知功之多者罪之尤今日破楚明日襲奪齊王軍方信為漢取天

下漢之心已未嘗一日不在取信也高帝平生親信無過蕭何者矣而且疑之況信耶信有必誅之勢而無人教之以蕭何避禍之策張良為帝謀臣使其為之畫善後計猶庶幾焉而躡足之諫召信會兵垓下之策皆所以甚帝之疑而置信於死者也失職怏怏謀反見誅雖信之罪而夷三族嗚呼甚矣

韓王信盧綰

信以韓王庶孽從漢復封韓既而漢疑之徙王太原數

被匈奴兵遣使求和解漢又責讓之遂走匈奴高帝是以有白登之圍疑之為患如此盧綰與帝居同里生同日學同師平生至相得非有大功而王之燕帝之於綰厚矣亦以貳心自成疑懼而走匈奴此則綰之罪也然信稱旦暮乞貸蠻夷僕之綰亦為蠻夷所侵嘗思復歸二人者皆非有大惡而踈遠取疑失身至此不亦悲夫此信之子顏當信之孫嬰與綰之孫他之皆脫身匈奴而復列侯漢廷也陳稀慕魏公子之為人監趙代邊兵

而賓客千餘乘卒於見疑而以反誅此尤庸妄可為戒矣

缺望據注是二字缺者決別而望者怨望○羽檄者插羽於檄取其急如飛鳥也

田儼

田儼自立為齊王秦殺之而儼之弟田榮遂田儼立田市怨楚之不殺田儼不從入關不得王榮乃并楚所立之王曰田都田安及田市而自王兵敗見殺榮之弟田

橫又立田廣為王為漢所滅橫走保彭越越歸漢橫走海島天下既定高帝召之未至三十里自殺其客二人亦自殺從留海島者五百人聞之皆自殺田氏兄弟之有人及得人如此異哉然死傷勇矣

樊鄴滕灌

樊噲起自屠狗從高祖多戰功諫正秦官脫難鴻門功尤雋焉然人有惡其黨呂氏高帝立命斬之軍中斯亦烈矣

酈商聚兵四千從高帝於沛積戰功為曲周侯其子酈寄給呂祿而太尉遂得入北軍安劉氏預有力焉

夏侯嬰脫高祖於亭長時脫孝惠魯元於彭城大敗時間關兵間已立戰功自高帝初起歷孝惠高后文帝常為太僕終其身蓋謹信可親之人歟

灌嬰起自販繒從高祖騎射戰功居多其後不為諸呂擊齊而共立文帝遂致位宰相蓋武健而有定識云

張丞相

傳為張蒼作也至漢末位丞相者皆附之蓋漢初丞相皆功臣自灌嬰死而張蒼繼始以文學好律呂至丞相申屠嘉又自御史大夫叙遷然能剛毅守正至景帝之世丞相備位僅存名氏太史公不復為傳而褚先生直取韋賢以下繼之於魏相稱好武於邴吉稱有大智於黃霸稱以禮義為治其後韋元成父子相繼匡衡十年至丞相皆歸之命有慨歎不滿之意矣

物故注云物無也故事也言無復所能於事然則士

馬物故者亦以死則無能於事故以為死之稱而此
傳稱冀幸丞相物故者以御史大夫望丞相之死而
遞遷言非以材德選也

酈生陸賈

酈生為高帝下陳留高帝賴其兵食遂以入關所繫大
矣然以善其令而夜半賊殺之與之善者不亦難乎此
戰國傾危之餘習宜其卒窮於辨也陸賈兩使尉他使
漢越無兵爭天下陰受其賜多矣時時稱說詩書一新

高帝馬上之習社稷靈長終必賴之矣其後知太后將王諸呂不可爭廼病免家居及諸呂將危劉氏則出為陳平畫策誅之動靜合時措之宜而功烈泯無形之表漢初儒生未有賈比也而太史公屈與酈生同傳豈以其辨說歟朱建以母死無以為喪而受辟陽侯金所謂行不苟合者安在嗚呼此其所以惡也

傅靳蒯成

傅寬靳歙從高帝兵間始終無困辱蒯成侯周緤軍乍

利乍不利終無離上心高帝憐其愛我云

劉敬叔孫通

婁敬脫輓輅

胡格切

羊裘見天子曰衣帛衣帛見衣褐衣

褐見此其質直不徇流俗已可覘其胃中之所挾持者

矣勸都長安逆覘敵情皆磊落出人意表惟結和親約

雖能寬一時之急未免遺萬世之弊耳叔孫通所事且

十主皆面諛取親貴既起朝儀得高帝心然後出直言

諫易太子然向使高帝未老吕后不彊度如意可攘太

子位又安知其不反其說以阿意耶隨時上下委曲取容名雖為儒非婁敬比矣

季布樂布

季布庭斥樊噲橫行之說使高后不復事兵然則孝惠高后之世海內無事衣食滋殖季布力也布故勇將不為技癢而有老成安靜之言斯可尚矣樂布挺身就烹以雪彭王之冤所以警悟高帝何如哉嗚呼非烈丈夫孰能與於此

袁盎晁錯

絳侯元勲也淮南王帝親弟也盎晚出為郎皆斥其驕
既而明絳侯無罪諫止淮南王遷蜀者亦盎也盎以故
名重朝廷下趙同之參乘却夫人之同坐申屠相稍不
為禮則折脅之盎殆以強直自矜者歟沮梁王之謀雖
以忠見賊迹其平昔亦非自全之道矣晁錯峭刻紛更
與盎素相疾輕挑六國之禍盎卒得以計誅之死又其
分也○袁盎不絕劇孟云緩急人所有此言可以處世

張釋之馮唐

張釋之論長者及其守法不阿馮唐之論將皆質直有古大臣之風焉

釋之之結轡王生與張良之納履類也以素昧則張良難以貴重則釋之難

主臣陛下

萬石張叔

萬石君家謹厚而已而父子皆致二千石已過矣慶備

位丞相於孝武多事之世何哉衛綰車戲士天資偶亦
謹厚而景帝相之且謂其可輔幼主夫帝謂亞夫非少
主臣宜綰之見取歟

張叔學刑名而能慈愛君子蓋取節焉直不疑償金已
非人情之正況周文溺袴行詐彼何為者而皆致位通
顯夫萬石家以誠得之而竊慕者亦僥倖殆流弊歟

田叔

叔以死事趙王敖既仕漢薦孟舒案梁王燒其籍使景

帝母子相安相魯能格其君之非叔蓋堅忍有用之才
非如萬石輩徒曰長者而已

褚先生附載田仁任安事衛將軍不見知而趙禹遴選
於一臨問之頃兩人皆立名天下夫衛青后戚家徒以
衣裝取士而以將百萬衆何哉

扁鵲倉公

扁鵲姓秦名越人得長桑君禁方能洞視五藏期趙簡
子之寤起號太子之死齊桓侯無疾望而退走果不可

藥又能隨俗為變斯亦奇且巧矣乃為李醯所忌而見殺太倉公淳于意即女子緹縈父也得乘陽慶禁方倉公既以緹縈免刑召問醫治纖悉如款案吁士亦何以術為○號太子事注云時號已減百二十餘年其字誤歟抑傳聞誤歟

吳王濞

封國不過百里名山大川不以封濞王吳五十三城且擅山海之利是置之死地也漢承秦滅六國之後徒見

六國之昔為諸侯王者無不地廣民衆而不知古制不
其然也宜無以善其後歟

魏其武安侯

魏其侯竇嬰竇太后從兄子也方景帝酒酣失言千秋
萬歲後傳梁王嬰獨引高帝約折之太后憎嬰輒病免
傳栗太子而太子廢數爭不能得復病免嘗為大將賜
金千斤金盡予軍吏而首進名將賢士之在家者蓋亦
賢於人多矣卒以失勢怏怏右使酒不遜之灌夫以觸

負貴好權之田蚡淪胥以滅雖死不悔可不悲哉與時
消息之機勞謙終吉之義士大夫不可一日不拳拳服
膺也

朝請注云律諸侯春朝天子曰朝秋曰請○辟倪

音與

脾倪同

○轅下駒者小馬隨母俛頭於車轅下○首鼠

兩端首鼠一前一却也○齮舌

見灌夫傳

韓長孺

再見漢抄

韓安國之仕梁也言於漢雖為梁飾非言於梁亦能為

梁免禍賂田蚡得仕漢其進雖不以正其辨王恢諫擊匈奴藥石武帝於尚安顧不偉甚越明年王恢挑禍匈奴安國默默為之護軍雖以不戰歸而兵端自此大開安國亦卒困兵間死矣志在富貴不知不可則止惜哉

李將軍

再見
漢抄

李廣才氣天下無雙死之日天下知與不知皆流涕亦可想見其人矣方武帝有事匈奴諸校尉才能不及中人以功取侯者數十獨廣結髮與匈奴大小七十餘戰

卒不得侯且死非其罪廣自恨殺降所致然則豈非為將者明戒耶○陵降匈奴隴西之士皆用為耻亦可想見其俗之風節矣

昆邪之昆

音魂

大黃者弩名色黃而體大

匈奴

傳之叙匈奴詳矣大抵以其視中國為強弱夏道衰而狄始大及周之興惟命之曰荒服周道衰戎狄又世世為患秦并天下築長城頭曼單于遂為之北徙既而中

國兵爭冒頓復興雖高帝不免白登之圍非其視中國
為強弱哉然嘗論之秦漢之待夷狄不可復以三代比
也三代以天下為公諸侯各自為守設不幸有警方伯
連帥以諸侯兵驅之而已然不常有也秦漢以天下為
私自京師去匈奴塞上皆天子所自制邊塵稍驚勞民
萬里雖鞭之長不及馬腹故秦之備邊不得不出於長
城然此毒民之事悖謬之舉適以自斃不可為也故漢
之求安不得不出於結約雖婁敬遣公主之說不可用

若孝文皇帝賜之書有曰天不頗覆地不偏載使兩國之民若一家下及魚鼈上及飛鳥跂行喙息蠕動之類莫不就安利而辟危殆嗚呼大哉言乎文帝之心天地之心也持之堅行之久至孝景世終無大寇武帝即位之初匈奴信漢自單于以下往來長城下無忌矣乃一旦無故自為狙詐於匈奴兵連禍結使天下生靈肝腦塗地然匈奴益驕亦終不我服回視文景之世得失何如哉我太祖時不過因李漢超輩使自為之守而邊烽

之警自不接於廟堂愚故嘗謂守在四夷三代公天下之事也無愛南北文帝得處之之道也內無制諸夏如漢而外因疆圉之臣以禦邊如三代其待夷狄之得自有天地以來未有如我太祖者也不使守封疆者久任世襲而欲身制萬里如在目睫天下無是理也武帝窮追且不能得其要領夷狄之患如之何不日接於中國耶

谷蠡

音鹿
雄

匈奴官稱

衛將軍驃騎

再見
漢抄

衛青者奴隸鄭季之遺孽而霍去病其甥也漢武帝以青之姊曰子夫者為后因生事夷狄而官青曰大將軍官去病曰驃騎將軍公孫敖嘗脫衛青於難亦官之至將軍青之長姊嫁公孫賀賀為將軍且至宰相其餘侯者非兩將軍親戚則其門下人也它日貳師將軍亦以後宮故生事大宛而使之貴帝平生窮兵黷武使海內蕭然觀其所由往往為榮宮妾地爾而曰春秋大復讐

之義其誰欺欺天乎且受圍與嫚書未可以讐言也文
景和親相安已久否而嚴守備則置一李將軍匈奴不
敢入塞矣何紛紛為

平津侯主父

平津侯公孫弘見讀漢書抄

主父偃姦險無賴小人其致身青雲特自速族滅之禍
耳何足污齒頰哉惟諫伐匈奴一書不當以人廢言然
它日勸築朔方俾襲蒙恬故步者即今日舉秦事以諫

伐匈奴之偃也何耶其勸分王諸侯則掇拾賈生之緒
餘也其勸徙豪民實茂陵則剽竊婁敬之陳言也何能
為漢庭決一策耶而取大臣金取諸侯金自謂日暮途
遠自分倒行暴施以生於齊而劫齊王殺之以游於燕
而陷燕王殺之召平日昆弟賓客戒其毋入偃門以一
切踈絕之何哉偃之為人也其自取覆滅也固宜為偃
之族者可悲耳

南越尉佗

自此漢
抄無之

南越稱帝文帝以德懷之而稱臣南越既稱臣武帝以
詐召之而輒反越雖夷狄人情亦槩可知矣用樓船十
萬師一旦夷以為郡豈不大快然使五帝三王處此亦
有文帝之懷柔而已夷狄在萬里外而必貪之何哉

東越

漢初稱越者凡三南越今二廣之地尉他居之閩越王
名無諸居閩今為福建中越東海王名搖居東甌今為
永嘉則皆越句踐後也閩越圍東甌漢救之徙東甌於

江淮間而閩越遂為東越東越以反誅漢盡徙其民江淮間而東越之地遂虛又有繇王者亦東越苗裔以斬東越王降漢封東成侯萬戶太史公謂禹之餘烈云

朝鮮

朝鮮王右渠者其祖名滿本燕人出塞居秦故空地本無預中國事也涉何為武帝生事其國漢卒盛兵以滅之為真番普寒反臨屯樂浪玄菟四郡漢固貪矣右渠負固自取滅亡亦何愚也

西南夷

唐蒙食枸醬於南越知其蜀物道西北牂柯江而來也
遂使夜郎以為犍為郡而治道指牂柯江此通南夷也
司馬相如又言西夷邛笮音昨可置郡自是通西夷道數
歲道不通西南夷又數反上用公孫弘之言罷西夷獨
置南夷夜郎兩縣矣張騫見蜀布邛竹杖於大夏知其
從東南身毒國來而邛之西二千里可到也自是天子
注意誅滅西南夷諸國為七郡惟滇王者楚苗裔也以

首善不誅與夜郎皆受王印云

七郡者犍為牂牁越雋益州武都沈犁汶山○枸醬
者枸音窶木似穀樹其葉如桑葉用其葉為醬酢美

○邛竹杖邛山之竹節高中實可為杖

司馬相如再見漢抄

相如文人無行不與吏事以賦得幸與倡優等無足汗
簡冊者亦無足多責惟封禪書禍漢天下於身後且禍
後世罪不勝誅蘭相如信威敵國名重泰山犬子何人

亦冒其名嗚呼禹聖神也而有張禹之禹湯興王也而有張湯之湯藺相如命世人豪也而有司馬相如之相如故曰人能美名名不能美人彼聖賢之名亦有時不幸而辱於小人也

相如之賦果何為者耶景帝之不好此人情之正也而武帝溺焉嗚呼於身則求藥長生於兵則窮威萬里於宮室則千門萬戶而於文則好相如之賦飄飄有凌雲之氣皆類也於是武帝之志荒矣

讀史記踰月其文往往暢達隔千歲如覲面斯亦奇
矣至相如傳游獵賦殆不勝悶悶蓋文所以載理安
有不關義理而可以言文者哉往歲嘗過村學堂見
為之師者授村童書名小雜字句必四字皆器物名
而字多隱僻義理無關余竊鄙之然本其所由作特
以識器物之名於世尚為有用今游獵所賦草木禽
獸句亦四字排比積疊皆世所希有怪誕不切世安
用此又不得與小雜字比也世或珍異之何哉此傳

去手復讀他傳如脫荊棘而履康莊欣快可知然世之好賦者烏知不笑余不識古文奇字顧余之所言者理爾他非所知

鱣

比目魚也

水玉

水精

淚莎

染紫草

盧橘世俗多用以稱枇杷

今按游獵賦云盧橘夏熟黃甘橙榛枇杷

而善反

柿

夫盧橘與枇杷並列則盧橘非枇杷明矣郭璞注蜀中有給客橙冬夏華實相繼通歲食之謂即盧橘也意者橙橘惟熟於冬而盧橘夏亦熟故舉之以為重

歟

后山以為一物二名

蒲陶

俗今作菊

○并閭

樓也

○棘

扶逼反

屬車古

者諸侯副車九重秦滅九國置八十一乘名屬車

淮南衡山

淮南厲王母本趙王張敖美人
事高祖有娠而留趙貫高謀反
美人逮繫既生厲王恚即自殺其
後厲王謀反自殺厲王子安謀反
自殺子衡山王賜亦謀反自殺恚
氣之所鍾如此然厲王椎辟陽侯
殺之辟陽侯死有餘罪非過也
晉孫恩以逆死妖黨謂其為水仙
淮南王安

以遂死方士謂其為仙而上升小人羞諱文飾之言類
如此而淮南雞犬之事至今為口實然則黃帝烏巢鼎
湖之事又可信耶○自三代選舉之法廢士無教養溢
出為縱橫之說戰國四豪復淵藪之餘風到漢未泯而
天下為一無所復售其姦往往諸侯之好事者若陳豨
若梁王若吳楚王若淮南衡山王無不以游士敗者士
習之所趨可畏哉學校既興科目繼之士心始有所底
然則為人上者其可不以人才為意而輕議學校科舉

鄙天下士者蓋未之思也

循吏

孫叔敖使民自高其車得誘民之術也公儀休不受魚
謹律身之常也石奢以父殺人李離以過聽殺人皆自
殺皆難能之節也

訥

空政反

○輿地圖輿猶盡載之義

見淮南傳

汲鄭

汲黯論帝多欲勸帝無起兵諫帝迎渾邪王切責張湯

苛法而拳拳願出入禁闥補過拾遺切直忠盡漢庭第一帝稍聽之何至下輪臺之詔耶

鄭莊委曲禮下雖少鯁諒之風然內行修潔沒無餘財與汲黯等此太史公以之同傳歟

酷吏

自此漢
抄無之

太史公於武帝征伐事先之以文景和親匈奴信漢然後論兩將軍連年出塞又必隨之以匈奴入塞殺略若干於今酷吏傳先之以吏治烝烝民朴畏罪然後論十

酷吏更迭用事又必隨之以民益犯法盜賊滋起然則
匈奴盜賊之變皆帝窮兵酷罰致之威刑豈徒無益而
已哉至於禱祠百出則各隨之以若有應符之言於求
仙無方則各隨之以終不可得之言遷之微文見意往
往如此而武帝之無道昭昭矣若其禍殺民命不知幾
萬萬桀紂之罪遠不至此蓋與秦皇同歸惟其輪臺有
悔顧命得人高文之澤在人尚新漢之天下賴以不絕
耳若夫萬世公議亦終不謂帝無道者秦滅儒術武帝

興之天地民生之所恃以立者在是也然則先立乎其
大者可不務乎

沈命法沈者匿也命者亡命也○椎埋者發冢一云
椎殺人而埋之

大宛

甚矣小人逢君之惡何甚也漢欲通西南夷費多道不
通嘗罷之矣張騫言可通大夏天子復欣然為之是窮
民西南之禍不在漢武而在張騫然騫從月氏至大夏

竟不得月氏要領其後復使烏孫亦不得其要領間關
萬里困苦終身騫果何利於此自是棄骨肉於萬里外
以妻烏孫自是沒士馬於萬里外以取宛馬天下騷動
耗費鉅萬萬騫又果何利於漢嗚呼甚矣小人逢君之
惡者不可曉也

太史公曰禹本紀言河出崑崙崑崙其高二千五百餘
里日月所相避隱以為光明其上有醴泉瑤池今自張
騫使大夏窮河源惡睹本紀所謂崑崙者乎嗚呼太史

公之論善矣然後世展轉沿襲之妄又豈止太史公所
闢而已哉蓋自是有譯西域書為中國語者又因崑崙
之說附會之為須彌山亦謂日月相避隱為光明而更
加張大謂周須彌之山為世界者凡四日所至為晝而
去之則為夜然天下安有是理哉若果如崑崙須彌之
說則日月之避隱常相等齊安從而有晝夜長短之分
日月之避隱常不相見安從而有晦望交蝕之異日常
滿月亦當常滿安從而月有虧盈進退之不同出沿山

之東入循山之西其地皆遠當僅見日輪之隱約日之方中居山之腹其地獨近當尤見日輪之顯大今日之出沒皆見其紅而大日之方中獨見其淡而小何也豈近反見其小而遠反見其大耶日東循山而天下曉當以地里之遠近漸次而曉日西轉山而天下昏當以地里之遠近漸次而昏營之東日出以寅則幽之西當以午幽之西日沒以酉則營之東當在晝今地里不問遠近出沒皆以寅酉何也豈避隱不以漸行或晝夜不係

日月耶夫日月東浮而西沉日行速而月行遲朔望有定寒暑無差交會剝蝕皆可預計吾儒歷法盡之矣易曰明出地上晉又曰明入地中明夷天體包地日月出沒其間行黃道赤道而有長至短至此有目者所共觀皆可稽而信故日月之說無出於吾儒所置歷象之法矣彼為崑崙須彌之說者何所稽以為信也運行之遲速交蝕之度數彼亦可得而言之否耶彼亦果見日月之隱隱遠從空中來又隱隱遠從空中滅而於東海西

崦果不相着否耶蓋異說雖從西域來實皆譯之者附會中國非聖之書以張大之而不復計其事之實也禹別九州固非能際天所覆然天地之中氣所聚而人物生焉者大抵亦不出此過此以往則天地四垂之偏荒忽不治聖人所不言也騶衍始謬為大言九之又九九之又九謂禹之九州不過天地間八十一分之一而譯者十萬億國土之說緣之興矣不思周天三百六十五度四分度之一日月星辰之所經紀皆可計見陰山之

雪以夏而日南之郡北戶天地間豈無紀極哉嗚呼出
之譽異端而甘自小者謂吾儒不過知造化內事而彼
所言者造化外事也自今觀之彼所言造化內且妄矣
況外乎造化果有外瞿曇氏當來往空虛中不假父母
陽陰氣以生又老於寒暑而死矣然則佛亦厭世俗煩
苦而求所謂寂滅耳說本不若是其誕也說之誕者譯
者附會之過也皆中國奸人之言也故因太史公斥崑
崙之說而併及之

游俠

朱家周人之急家無餘財而終身不自以為德太史公
慕焉郭解折節振人人為解殺人解不知而公孫弘族
解太史公尤為之痛惜愚謂朱家誠賢矣為人忘己墨
氏之弊而解之見殺則亦其平昔嗜殺所致孔子有言
古之學者為己孟子亦謂窮則獨善其身士亦何必務
名譽出於尋常之外也哉○解之甥彊人酒見殺灌夫
亦以彊田蚡酒忿亂族誅夫酒者所以行禮而其弊至

此世之好彊人飲者可以監矣

佞幸

佞幸辱國旋亦誅僇

滑稽

三年不蜚不鳴之語楚世家以為伍舉說莊王今滑稽傳又以為淳于髡說齊威果孰是孰非耶楚莊王時三晉未分今載優孟諷諫莊王預有齊趙陪位韓魏翼衛之語而扁鵲傳載扁鵲起虢太子於已死考其時虢已

亡百二十餘年又其可信耶自古可怪可笑人情樂聞之說往往轉相附會未必盡有其實我朝東坡蘇公一世入豪惟其善於笑談喜納浮屠故至今謔浪俚談類必託之東坡佛印且曰東坡之見辱於佛印者如此而本無其實也嗚呼其殆此類歟西門豹為鄴令除河伯娶婦曲盡其術蓋愚民久已成俗若徒論之以理制之以威雖暫止必復作殺人將終不已故使巫媼三老先自赴水問河伯為之首者自畏死而不敢為後無為之

首自不待禁而絕此仁者之術而智者之事也褚先生以附滑稽何哉

金馬門者宮署門門傍有銅馬故以為名

日者

傳為楚之卜人司馬季主作也謂宋忠賈誼問卜於市而季主歷詆士大夫之為非自陳卜者之為貴殆有取其譏世之言而載之歟然未必皆其實也果其實則亦小道致泥放誕不孫人也士大夫雖未必皆賢然必士

大夫布列中外上自朝廷下達郡縣上綱下紀共為扶植而後庶民得以生息於其下所謂代天工者也若卜之為伎不在農工商賈之列浮浪竊食又不得與庶民之良者比顧乃算計利害自逞得計反譏士大夫之不肖何異衣食於祖父而反笑祖父之無聞知而宋忠賈誼反屈於其說哉愚故曰未必皆其實也而乃傳之者不得志於當世之忿心爾


龜策

三代之興各以卜筮決疑漢興因秦太卜之官歷孝惠文景未嘗講試武帝延百端之學太卜大集然倚以卜兵事賞賜至或數千萬而誅滅者不可勝數則卜非其卜矣褚先生附載著龜之說頗詳若宋元王以神龜強國之事則伎藝之言非有識之論也

太史公自序

談生遷能以文章世其家揚名後世亦可謂善繼人之志者矣然談垂死涕泣之屬惟以不得從封泰山為恨

而遷述之豈遷亦不知封禪之為非耶



黃氏日抄卷四十六